



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL

Komunikadu Imprensa

19 Maiu 2014

JSMP organiza treinamentu Asesu ba Justisa ba Estudante Sekundáriu Públiku Paralelu Seracotec Salele- Distritu Covalima

Iha 15 Maiu 2014, JSMP liuhosi Unidade Peskiza Legál (LRU) hala'o treinamentu iha Eskola Sekundáriu Públiku Paralelu Seracotec Salele, Sub-distritu Tilomar, Distritu Covalima kona-ba Asesu ba Justisa.

Objetivu hosi treinamentu ne'e mak habelar informasaun no hasa'e koñesimentu estudante sira nian kona-ba oinsa bele asesu ba sistema justisa formál no knaar ho responsabilidade autór sira justisa nian.

Estudante sira ne'ebé partisipa iha treinamentu ne'e hamutuk na'in 30 ne'ebé kompostu hosi feto 17 no mane 13.

"Treinamentu sira ne'ebé JSMP halo aleinde ba comunidade sira, halo mós ba estudante sira ne'e nu'udar kontribuisaun konkretu JSMP nian ba habelar informasaun no promove asesu ba justisa formál ba ema hotu-hotu, dehan Diretór Ezekutivu JSMP, Luis de Oliveira Sampaio.

Iha treinamentu ne'e, JSMP fahe informasaun no esplika kona-ba saida mak direitu umanu, lei, Kódigu Penál, Kódigu Prosesu Penál, krime públiku no krime semi-públiku. JSMP mós esplika kona-ba papél tribunál, juís, Ministériu Públiku, Polisia, Defensór Públiku no Advogadu Privadu sira nian.

Estudante sira entusiasmu tebes ho treinamentu ne'e no partisipa ativamente iha sesaun diskusaun ho foti kestaun barak kona-ba asuntu justisa.

Asuntu interesante ne'ebe estudante sira apresenta, sira husu ba instituisaun relevante hanesan Sekretariu Estadu ba Promosaun Igualidade atu halo sosializasaun kle'an ba Lei Kontra Violensia Domestika nune'e bele prevene violência domestika diak liu tan iha futuru.

Estudante sira sublina katak hanesan nasaun foun, sira haksolok tanba Timor Leste iha ona Lei Kontra Violensia Domestika, maibe husu ba autoridade kompetente sira atu halo programa sosializasaun ba estudante sira atu iha koñesimentu adekuada kona-ba lei ne'e.

Profesór ne'ebé responsavel ba Eskola Sekundária Paralelu Seracotec, Sr. Paulo A. Cardoso hato'o nia agradesimentu wa'in ba JSMP tanba bele hili hodi hala'o treinamentu iha sira nia eskola. Profesór ne'e hatutan tan katak materia sira ne'ebé fó iha treinamentu ne'e nu'udar materia foun no importante tebes atu estudante sira hatene.

Atu hetan informasaun kle'an liu tan favór kontaktu:

Luis de Oliveira Sampaio
Diretór Ezekutivu JSMP
info@jsmp.minihub.org
Telefone: 3323883 | 77295795
www.jsmp.tl